

TEFRIKA

KOLEKTIVNE DŽENAZE I OBILJEŽAVANJE GODIŠNJICE GENOCIDA I DRUGIH TEŠKIH ZLOČINA NAD BOŠNJACIMA

U VLASENICI KLANJANA DVADESETA KOLEKTIVNA DŽENAZA

Na Šehidskom mezarju Rakita u Vlasenici 20. aprila 2024. godine obavljena je dvadeseta kolektivna dženaza za žrtve Agresije na Bosnu i Hercegovinu s područja Vlasenice. Na ovoj kolektivnoj dženazi ukopan je Ahmo Kavazović, a dženaza-namaz predvodio je muftija tuzlanski dr. Vahid-ef. Fazlović.

Ahmo Kavazović je imao 44 godine kada je 1992. godine ubijen na području Vlasenice. Najprije je zarobljen u hangarima logora Sušica, iz kojeg je krajem maja, zajedno sa većom grupom zarobljenika, odveden i likvidiran. Njegovi posmrtni ostaci ekshumirani su iz masovne grobnice na lokalitetu Sušica, koja je otkrivena u septembru 2000. godine.

Dan ranije u svim džamijama na području MIZ Vlasenica proučen je tevhid pred duše šehida,

a u Vlasenici je održana promocija knjige "A bili su samo djeca" dr. Husejina Omerovića.

Za zločine na području vlaseničke općine pravomoćno je u Haškom tribunalu na dvadeset godina osuđen Dragan Nikolić Jenki, te u Sudu BiH Predrag Bastah Car na dvadeset dvije godine i Goran Višković Vjetar na osamnaest godina zatvora.

U MEMORIJALNOM CENTRU VELJACI KLANJANA DŽENAZA U ODSUSTVU ZA UBIJENE BOŠNJAKE BRATUNCA

Na šehitlucima u Memorijalnom centru Veljaci u Bratuncu 12. maja 2024. godine klanjana je dženaza u odsustvu, koju je predvodio muftija tuzlanski dr. Vahid-ef. Fazlović.

„Ovo je dan u kojem se na ovom mjestu u Šehidskom mezarju Veljaci u Bratuncu okupljamo već osamnaest puta. Danas, braćo i sestre, nismo imali tabute ispred nas, iako tražimo šest stotina Bošnjaka, a nekoliko desetina naših šehida čeka na identifikaciju“, podsjetio je muftija tuzlanski.

Istakao je da smo zbog navedenih činjenica kao društvo pokazali veliku nemoć te da hitno treba naći odgovor zbog čega je to tako.

U Veljacima je do sada ukopano 316 posmrtnih ostataka ubijenih Bošnjaka tokom Agresije na našu domovinu, a blizu 400 osoba je ukopano izvan ovog Memorijalnog centra.

Program *Sjećanje na zločin nad Bošnjacima Bratunca 1992-1995.* trajao je od 3. do 29. maja 2024. godine i ovo je osamnaesta godina kako se na ovakav način sjećamo žrtava i podsjećamo da se ne smiju zaboraviti počinjeni zločini nad Bošnjacima Bratunca.

KLANJANA KOLEKTIVNA DŽENAZA ZA ŽRTVE ZLOČINA U ZVORNIKU

U Memorijalnom kompleksu i šehidskom mezarju Gornja Kalesija 1. juna 2024. godine klanjana je dvadeset šesta kolektivna dženaza civilima ubijenim na području općine Zvornik tokom Agresije na Bosnu i Hercegovinu.

Svoj smiraj je nakon trideset dvije godine pronašao Džemal Manjić, rođen 1962. godine u Gornjoj Kamenici. Imao je trideset godina kada je ubijen 1992. godine na području općine Šekovići. Njegovi posmrtni ostaci ekshumirani su na lokalitetu Pelemiši, na području općine Šekovići, u augustu 2004. godine.

Dženaza-namaz je predvodio reisul-ulema Islamske zajednice u Bosni i Hercegovini Husein-ef. Kavazović.

„Okupili smo se ovdje, među našom braćom i sestrama, našim šehidima, da na bolji svijet ispratimo ostatke kostiju našeg brata Džemala, šehida koji je svojim životom svjedočio vjeru u Boga i koji je svojom žrtvom potvrdio da oni koji nevini padnu na Njegovom putu nisu mrtvi, nego živi, kako nas Kur'an uči. Bog nam je u Kur'anu kazao da nisu isto dobro i zlo, nisu isti put vjere i dobra, i put mržnje i zla. Onaj narod koji napusti prošlost, slogu i jedinstvo, na najboljem je putu da mu se ponovi Srebrenica, Vlasenica, Zvornik, Mostar, Prijedor, i mnoga druga naša stratišta. Zato vas molim, sačuvajmo našu prisebnost, odlučnost i znajmo da uvijek moramo biti na strani dobra, da bi nas drugi po dobru spominjali“, poručio je Reisul-ulema.

Kolektivna dženaza u Memorijalnom centru u Gornjoj Kalesiji centralni je dio obilježavanja godišnjica zločina nad bošnjačkim stanovništvom Zvornika.

Prije dženaze, u Bijelom Potoku je otvoreno Šehidsko spomen-obilježje za 675 Bošnjaka, muškaraca i dječaka iz nekoliko zvorničkih sela, koji su 1. juna 1992. godine razdvojeni od svojih porodica a zatim ubijeni. Njihovi posmrtni ostaci pronađeni su u masovnim grobnicama širom Podrinja. Još uvijek se traga za posmrtnim ostacima preko dvije stotine žrtava ovog stravičnog masakra.

USVOJENA REZOLUCIJA O GENOCIDU U SREBRENICI

Generalna skupština Ujedinjenih nacija usvojila je 23. maja 2024. godine Rezoluciju o genocidu u Srebrenici. Nakon rasprave koju su otvorili predstavnici Njemačke, 193 države su pristupile glasanju te usvojile Rezoluciju. Sjednici su prisustvovali članovi Predsjedništva Bosne i Hercegovine Denis Bećirović i Željko Komšić.

Nacrt Rezolucije su prvi put službeno predstavile Njemačka i Ruanda 18. aprila u zgradi UN-a u New Yorku. Ove dvije zemlje, koje su inicirale Rezoluciju, najveći su sponzori njezinog usvajanja, a nacrt je kosponzoriralo 39 država.

Ovo je historijska odluka koja će, prije svega, biti od velikog značaja za porodice žrtava genocida u Srebrenici.

SREBRENICA: KLANJANA DŽENAZA I OBAVLJEN UKOP ČETRNAEST ŽRTAVA GENOCIDA

U mezarju Memorijalnog centra Srebrenica – Potočari 11. jula 2024. godine klanjana je dženaza-namaz i obavljen ukop četrnaest žrtava Genocida počinjenog u ljeto 1995. godine u Srebrenici. Dženaza-namaz predvodio je reisul-ulema islamske zajednice u Bosni i Hercegovini Husein-ef. Kavazović, a prisustvovala su hiljade ljudi.

Prije dženaza-namaza održan je vjerski dio programa, a nakon dženaze je čitanjem imena počelo iznošenje tabuta iz Musale Memorijalnog centra. Preživjeli Srebreničani, članovi porodica ubijenih, prijatelji i komšije, na rukama su prenijeli zelene tabute s posmrtnim ostacima do mezarja.

Ukopani su Hasib (Uzejir) Efendić, Ćamil (Uzejir) Efendić, Mehmed (Daut) Krdžić, Sabrija (Asim) Omić, Mušan (Ramo) Šiljković, Sakib (Ragib) Harbaš, Beriz (Omer) Mujić, Ahmet (Ismet) Jašarević, Nevres (Mehmed) Salihović, Ibrahim (Muharem) Salkić, Midhat (Adem) Bašić, Hajdin (Kadrija) Mustafić, Latif (Arif) Mandžić i Hamed (Ibrahim) Salić.

PROF. DR. ISMET BUŠATLIĆ DOBITNIK POVELJE "HASAN KAIMIJA" ZA ŽIVOTNO DJELO

Centralna svečanost Kulturno-vjerske manifestacije *Dani Hasana Kaimije*, koju organiziraju Muftijstvo tuzlansko i Medžlis Islamske zajednice Zvornik, održana je 7. juna 2024. godine u Domu omladine u Zvorniku.

Dani Hasana Kaimije prvi put su održani 1991. godine u Zvorniku. Zbog teškog vremena tokom i neposredno nakon Agresije na Bosnu i Hercegovinu nije bilo moguće održavati ovu manifestaciju. Tako je ovo bilo dvadeset i prvo ljeto u kojem Bošnjaci Zvornika *Danima Hasana Kaimije* jačaju svoju duhovnost i kulturu u Zvorniku, a posljednjih godina i u drugim gradovima Podrinja. Manifestacijom se afirmiraju vrijednosti Zvornika i cijelog Podrinja.

Organizacioni odbor manifestacije donio je odluku da se Povelja „Hasan Kaimija“ za životno djelo za 2024. godinu dodijeli prof. dr. Ismetu Bušatliću za ukupni doprinos koji je svojim predanim radom dao Islamskoj zajednici i muslimanima na odgojno-obrazovnom i naučno-akademsom planu.

Plaketa „Hasan Kaimija“ za najbolje objavljeno djelo ove godine je dodijeljena prof. dr. Adnanu Jahiću za djelo „Između čekića i nakovnja – bosanskohercegovački muslimani (Bošnjaci) u Drugom svjetskom ratu (1941-1945)“.

Ovom prilikom održan je i omaž književniku Hadžemu Hajdareviću, koji je dugi niz godina bio član Organizacionog odbora manifestacije i učestvovao u brojnim programima. Dobitnik je Plakete „Hasan Kaimija“ u 2021. godini za književno djelo zbirku rubaija „Arabeske od vode“. Učesnici ovog sjećanja na književnika su bili muftija tuzlanski dr. Vahid-ef. Fazlović, Bajro Perva, dr. Alen Kalajdzija, mr. Meho Šljivo i mr. Mustafa-ef. Muharemović.

DVIJE DEZENJE JU CENTAR ZA REHABILITACIJU OVISNIKA O PSIHOAKTIVNIM SUPSTANCAMA

Reisul-ulemu Islamske zajednice u Bosni i Hercegovini Husein-ef. Kavazović je 5. septembra 2024. godine posjetio muftija tuzlanski Vahid-ef. Fazlović sa predstavnicima Centra za rehabilitaciju ovisnika o psihoaktivnim supstancama, direktorom Mevludinom Joldićem i predsjednikom Upravnog odbora Samirom Buljubašićem. Povod posjete bio je obilježavanje dvije decenije od osnivanja CROPS-a. Jedan od programa kojim je obilježen ovaj važan jubilej je naučni skup *Integrativni pristupi u prevenciji i liječenju ovisnosti: duhovni, zdravstveni i društveni aspekti* održan 19. septembra u Lukavcu.

Program Centra za rehabilitaciju ovisnika o psihoaktivnim supstancama podrazumijeva duhovno, psihološko i socijalno oporavljanje, radno-okupacione aktivnosti i sticanje radnih navika, sport i tjelesnu rekreaciju, te se korisnicima nudi potpuno novi stil života. Pokrenuto je i savjetovalište u Tuzli, te se provodi preventivni program u školama i kroz aktivnosti Mreže mladih. U proteklom periodu opremljena je knjižara i studio, nabavljeni su CNC strojevi i neurofeedback, proširena plastenička proizvodnja te se trenutno obrađuje oko 20 duluma zemlje na kojoj se uzgaja voće i povrće za potrebe kuhinje ovog centra. Centar trenutno ima 13 zaposlenih i 20 korisnika, a u proteklom periodu kroz ovaj centar prošlo je oko šest stotina muškaraca iz svih krajeva Bosne i Hercegovine i inozemstva.

PET STOTINA GODINA HADŽI ISKENDEROVE DŽAMIJE U GORNJOJ TUZLI

U Gornjoj Tuzli je od 11. do 15. septembra 2024. godine održana manifestacija kojom

je obilježeno pet stotina godina postojanja Hadži Iskender džamije, te dvadeset godina od njene temeljite obnove. Tim povodom je u petak, 13. septembra, džuma-namaz u Hadži Iskender džamiji predvodio i hutbu kazivao Husein-ef. Kavazović, reisul-ulema Islamske zajednice u Bosni i Hercegovini.

Hadži Iskender džamija, u narodu poznata i kao Čaršijska, podignuta je 1525. godine u centru naselja. Odatle će se granati druge mahale, s mesdžidima i džamijama u njima. Džamiju je izgradio Hadži Iskender, po kome su i džamija i mahala dobili ime. Na njoj je, u različitim vremenima, izvršeno više preprevki i intervencija. Nagrižena zubom vremena i granatiranjem u toku Agresije na Bosnu i Hercegovinu, Hadži Iskender džamija je posljednji put rekonstruisana prije dvadeset godina. Svečano otvaranje džamije nakon temeljite obnove i proširenja održano je 11. septembra 2004. godine.

U okviru Vjersko-kulturne manifestacije „500 godina Hadži Iskender džamije u Gornjoj Tuzli (dvadeset godina od obnove)“, koju su organizirali Muftijstvo tuzlansko i MIZ Gornja Tuzla, održana je večer Kur'ana i zikra te organiziran okrugli sto „Gornja Tuzla u vremenu“ na kojem je predstavljena knjiga dr. Seada Seljubca „Moja Gornja Tuzla – vjerski život u XX stoljeću“. Također, otkrivena su obilježja na mjestima na kojima su nekada bili Gornjotuzlanska medresa i džamije porušene nakon Drugog svjetskog rata, te izveden tradicionalni carski mevlud u Hadži Iskender džamiji.

PRIZNANJE I NAGRADA "REDŽEP-EF. MUMINHODŽIĆ" URUČENI SAFET-EF. KARAHMETOVIĆU

Muftija tuzlanski dr. Vahid-ef. Fazlović uručio je glavnom imamu Safet-ef. Karahmetoviću priznanje i nagradu za muallimski rad „Redžep-ef. Muminhodžić“ za mektebsku 2023/24. godinu.

Priznanje i nagrada su uručeni na svečanom dijelu sjednice Savjeta za vjerska pitanja Muftijstva tuzlanskog koja je održana u četvrtak, 21. novembra 2024. godine.

Safet-ef. Karahmetović, sin Mehmedalije i Zlate, rođen je 1975. godine u Zelinji Srednjoj, općina Gradačac. Gazi Husrev-begovu medresu u Sarajevu završava nakon Agresije na našu domovinu. Usljed ratnih dejstava i Agresije na Bosnu i Hercegovinu privremeno je prekinuo školovanje u Medresi te se priključio Armiji Republike Bosne i Hercegovine. Diplomirao je na Univerzitetu Ez-Zejtuna u Tunisu. Kao glavni imam i imam u povratničkom medžlisi i džematu (Medžlisa Islamske zajednice Bosanski Šamac) predvodio je aktivnosti obnove infrastrukture, pokretanje značajnih programa i zalaganje za ostvarivanje prava povratnika Bošnjaka na ovom području manjeg bosanskohercegovačkog entiteta RS. Trenutno je glavni imam za medžlise Bosanski Šamac i Odžak, a u jednom periodu je bio i glavni imam Medžlisa Islamske zajednice Modriča. Profesor je Islamske vjeronauke u srednjim školama u Modriči, Vukosavlju i Bosanskom Šamcu. Kao jedan od pomoćnika rukovodioca Ureda za hadž i umru Rijaset Islamske zajednice u BiH, kontinuirano sudjeluje u organizaciji hadža i umre iz Bosne i Hercegovine. Aktuelni je predsjednik Skupštine Udruženja Ilmije Islamske zajednice u BiH.

**PRIZNANJE ZA DOPRINOS IZUČAVANJU
KUR'ANA I KUR'ANSKIH NAUKA
HAFIZU PROF. DR. FADIL-EF. FAZLIĆU POSTHUMNO**

Odbor za dodjelu *Priznanja za doprinos izučavanju Kur'ana i kur'anskih nauka* u sastavu: muftija tuzlanski dr. Vahid-ef. Fazlović, predsjednik, glavni imam Medžlisa Islamske zajednice Tuzla hafiz Ahmed-ef. Huskanović, dr. Sead-ef. Seljubac i hفز. dr. Edin-ef. Peštalić, članovi, na sjednici održanoj 23. decembra 2024. godine, donio je odluku da se *Priznanje za doprinos izučavanju Kur'ana i kur'anskih*

nauka posthumno dodijeli rahmetli hafizu prof. dr. Fadil-ef. Fazliću.

Rahmetli hafiz Fadil-ef. Fazlić, sin Ibrahima i Hanifa-hanume, rođen je 1. novembra 1951. godine, u Prnjavoru (Kalesija). Završio je Gazi Husrev-begovu medresu, te je diplomirao, magistrirao i doktorirao na Fakultetu islamskih nauka u Sarajevu. Bio je imam, hatib i muallim u Sarajevu, zamjenik vjersko-prosvjetnog referenta pri Odboru Islamske zajednice u Sarajevu, profesor kiraeta u Gazi Husrev-begovoj medresi i imam Gazi Husrev-begove džamije. Njegov doprinos izučavanju Kur'ana i kur'anskih nauka posebno se ističe u periodu rada na Fakultetu islamskih nauka gdje je izabran za predavača 1993. godine, a za šefa Katedre za kiraet, imamet i hatabet postavljen je 2006. godine. U svom naučno-istraživačkom radu hafiz dr. Fadil-ef. Fazlić objavio je veliki broj stručnih radova, recenzija i članaka i četiri vrijedne knjige (*Tedžvid za studente Fakulteta islamskih nauka, Komparacija Hafsovog i Veršovog kiraeta, Mushaf Fadil-paše Šerifovića i Hafizi u Bosni i Hercegovini u posljednjih 150 godina*). Na Ahiret je preselio 26. marta 2012. godine. Mezar mu je u haremu Ferhadija džamije u Sarajevu.

Priznanje za doprinos izučavanju Kur'ana i kur'anskih nauka, koje Medžlis Islamske zajednice Tuzla dodjeljuje već šesnaestu godinu, uručeno je porodici hafiza Fazlića na Večeri Kur'ana u Džamiji "Kralj Abdullah" u Tuzli, 31. decembra 2024. godine.